

SCHROTT - SCHNITZELBÄNKE FASNACHT 2010

Schrott isch do, Schrott isch cho
Um wieder öpper abe z'lo
Schrott isch do, Schrott isch cho
Jo jetze si mer do
Dä Schrott – wo mir jetz vo n'is gäh
Dörft Dir nid z'fescht z'Härze näh
S'isch Narrezyt – s'isch Fasnachtszyt

Berner Rundschau – was? – scho tot!

Melodie: Basler c fff g aa g ff ee f gg

Letscht Herbscht, ir Zitig isch äs nur schmürzelig publiziert
D'Berner Rundschau zum Langenthaler Tagblatt wird mutiert
Zöut s'ganze Oberaargau jetze neu zu Langenthal
Do wärde mir nid g'frot – mir hei jo gar kei andri Wahl
Im Regio-Teil hesch aube unger Ämme chönne finge
Muesch jetz im ganze Teil sueche - öppis vo Bätterchinge

Äs isch sogar scho bis a Znünistamm i Stärne cho
Dass d'Rundschau-Zitig hett ä nöie Name übercho
Der Hunziker Martin hett das stiif und fescht dementiert
Doch isch är jetz - wie Mellenberger ou - orientiert

Us em Dorf

Melodie: Basler c fff faa g f ddd g b-b

So Rächnige go zahle brucht viu Zyt und schiisst ou a
So hett die Frou scho feiechli ä höchi Bigi gha
Äs Dachfänster grad obedra - für früschi Luft isch's guet
Doch sött me luege, wenn me furt geit, dass me's ou zue tuet

Letscht Summer isch uf's Mau ä grobe Sturm hie dürezoge
Und so si die Papier im ganze Schache umegfloge
No Tage später bringe Schiine – Nachbare, so flotti
No säute hett's so viu Bsuech gha – das Blumenauer Lotti

Us em Dorf

Melodie: auf den schwäbsche Eisenbahne

Gar nid guet louft ihres Gschäft
D'Krise git ihm fasch dr Räscht
„Mir müesse luege“ - seit zur Astrid dr Urs
U entlaht Manne vor Mühli – dass är nid macht Konkurs

Rite - jo das isch vou im Trend
Dört si d'Zahle besser - het är erkennt
Mit äm Ponyhof –s'isch ä Verein – du chasch di profilere
Bsungers we no jedes Jahr vo 500.-- Stutz vor Gmein chasch
profitiere

- Lieber no ä Schiss uf dr Schtross vom Aeschbacher sire Chue
- Als gratis d'Plakat vom Ponyhof – i Dorfigangstafele ine tue

Us em Dorf

Melodie: Der Hansjakobli und s'Babettli

Der Röthlisberger Güschtu wetti
Chli meh Gäud är ir Buese hätti
Drum geit uf d'Bank är grad go hole
Vo sire zämegsparte Chole

Ä Ma scho dinn – Güschtu muess warte
Bis är cha ine ha si Charte
Der Code igä und s'Gäud chunnt use
Gli druf erfasst ihn s'grosse Gruse

Der Chnopf für d'Tür wott är jetz drücke
Doch d'Tür ke's Mü me tuet ufrücke
Ir Bank in isch är jetze gfange
Und muess uf Hilf vo dusse plange

Dä Knopf isch doch süsch immer gange
Güschtu lot scho si Chopf lo hange
Da gspürt ä Luftzug är – ä fine
Vo duss chunnt Ursenbacher ine

Oh UB du bisch mini Rettig
Vo mir us sött's viu meh gä settig

Us em Dorf

Melodie: Oh, mami; oh mami, mami blue...

Im SAB hett's eis Mau ziemlech tönt
Mit Guggemusig-Sound, wo drönt
Ä nöii CD wird ufgnoh – vo Schrottofo

Na'm spiele hett's de Durscht no gäh
Der Dani Held wott eis go näh
Bim Pub tuet är grad zuecheha – mit Mühlma

Refrain: oh Dani, oh Dani, Dani blue, oh Dani blue

Äs Zwätschge-Lutz muess jetze si
U de no s'paari hingedri
1 Fläsche Schnaps, die hett nid glängt – s'wird no meh zwängt

Am Morge geit's am Held nid guet
Si Nase, die verlürt viu Bluet
So muess är grad i's Spital ga – dä armi Ma

Refrain: oh Dani, oh Dani, Dani blue, oh Dani blue

Im Spital cha me's guet verstah
Der Dokter luegt ihn schnippisch a
Kes Wunder, dass das Bluet so rünnt – mit Schnaps verdünnt

Refrain: oh Dani, oh Dani, Dani blue, oh Dani blue

Öppis vom Dorf – vo Bärn befohle

Melodie: Basler c fff f aa g f ddd f b b

Mir hei ou scho vom Rouchverbot in Bätterkinde brichtet
Drufabe wird im Pub ou scho ä Glas-Chaschte i'grichtet
Im Bäre ung scho immer hesch vorusse müesse stah
Doch dert im Stärne einzigartig sie d'Idee hei gha

Vo nün bis elf chasch roucke dert im Sääli wie ne Moore
derzue es Kaffee näh und über s'Dorf no chli go schnore
Schnäu lüfte jetz, dass z'Mittag rouchfrei chasch fein go
diniere

Am Abe tuet me's wieder zum Fumoir umfunktioniere

Kei Informatione chöme düre – mi blibt dicht
Der Stamm und d'Ratskollege säge nüt – niemer macht Bricht
Doch eine macht no geng chli Seich – me gseht ihn ou nid minder
D'Red isch vom neue Presidant vor Gmeind – am Beat Linder

- Lieber doch no d'Ärbssuppe go choche, wie d'Landfroue uf Utzistorf
- Aus immer me Kebab- und Döner-Lädeli i jedem Dorf

SAB-Heizung

Melodie: Das alte Haus von Rocky Dockey...

Üses SAB isch chli veraltet, üses SAB isch nüm ganz fit
So muess d'Heizig saniert wärde, dass me brucht nüm so vii Sprit
Mi hett glochet hingerusse und ä Bohrer abeglah
So dass de die nöii Heizig flott söu ga

Refrain:

Das alte SAB ar Ämme usse - hat vieles schon erlebt
Kein Wunder, dass es fröstelt - wenn d'Heizig nid rächt geht
Bim alte SAB ar Ämme usse, - isch nümme aues guet
Die Heizig muess jetz g'flickt si – süsch git's no böses Bluet

Äs Experten-Büro kontaktiert me – so cha's nümme ga
Der Kurt Nenniger, für settig Fäu – isch är der richtig Ma
Doch jetz das Mau – mir vermuete das - ä Fähler chli fatau
Hett am Änd vergässe är der grossi Saau?

Refrain:

Das alte SAB ar Ämme usse - hat vieles schon erlebt
Kein Wunder, dass es fröstelt - wenn d'Heizig nid rächt geht
Los Kürtu Nenniger muesch äüä - no Mau derhinger ga
Dass d'harmonie bir Musigprob nüm ganz so chalt muess ha

- Lieber doch no chli ä Strubi im Bett
- Als vor em Fänschter ha äs Minarett

- Lieber äs Schümeli Schnee scho Afangs Novämber
- Als dir als Alt-Gmeindschriber ds'Militärvelo lo chlaue us am Ständer

Vo de Vereine

Melodie: ei du scheene...

Äs isch ä Leischtig – s'isch enorm
Zudäm si die Lüt - ganz toll in Form
Theater spiele liegt ihne im Bluet
Bim feschte si sie ou schühli guet
Derzue hei sie hüür - äs Jubiläum im Verein
Dr TV isch zum 10. Mou - ar Fasnacht im Skiwuchenänd
– und nid deheim

Mänge Servicetechniker - würd nidisch wärde
Wenn sie das Arsenal - sichte täte
I dere Chischte inne - isch aues schön ufgreit
Jedes Dingeli hett si Platz – für e nächscht Isatz bereit
Kabubinder, äs Mässer, Papiernastüechli, Ersatzwösch,
ä Huffe Tapes, ä Poukeschlüssu, Isolierband,
Ersatzschläger, Coca-Cola und öppis z'roucke
Hett's ir Koffere - vom Ändu Gilomen – zum spiele Pouke

Vo de Vereine

Melodie: Mir fahre mit dr SBB

Vo Bätterchinge ghört me vii – s'isch national bekannt
Di SF bi de Lüt chasch gse – vor Stadt und ou vom Land
Dr Hartmann Nik mit sine Lüt – chunnt d'Flames cho porträtiere
Äs brucht Zit u Geduld und git so mängs z'organisiere

Bi Filmufnahme vom Oberli Serge – klappt's nid vo Afang a
Der Regisseur wott weder Müdu's no Obi's Gring druff ha
Bim Match filme klagt eine stark – da meint Hartmann ganz
g'lasse
Los Suter Bruno wotsch nid lieber Schach spile und jasse

Öppis vom Dorf (LANDI)

Melodie: Basler c d eeeee g a eeeee g a dddddd c h c c

Wotsch ä neue Lieferwage – de muesch nid lang umefrage
geisch zum HUK dir go ne schöne Renault poschte

So hett's d'LANDI letscht Jahr gmacht – dass sie chöi fuehre
ihri Fracht
Chischte, Palette – und ou no Frücht zum moschte

Dass bim lade nid muesch flueche – muess ä Hebebühni
zueche
das isch doch so gäbig – ou wenn's chli tuet choschte

Doch oh Schreck, mi hett's vergässe – hätt doch s'Gwicht no
söue mässe
Chasch jetz nid e Mau äs voll's Pallett drufmoschte

Wüu dä Renault süsch wird z'schwär – losit Lütt, äs isch kei
Mär
Hei derzue sie müesse – ä Ahänger poschte

Vor Gmeind

Melodie: Basler c fff f aa g f ddd f b b

Letscht Früehlig hei sie bschlosse – ohni dass's öpper tuet reue
Für d'Gmeind ä nöii Maschine – wenn's gfrürt de Salz go z'streue
Doch d'Bstellig geit vergässe lang – das wird üs bau chli z'bunt
Der Winter isch scho lang verbi - wenn de dä Streuer chunnt

Öppis vom Dorf

Melodie: Basler c fff f aa g f ddd f b b

Ä Ma wott nach em schaffe öppis choche, wo isch fein
Chli Suurchabis, derzue Härdöpfu und no chli vom Schwein
So tuet är na de Sächse de die Pfanne uf e Herd
Mit chliner Hitz, wie n'är das denn ir Dorfmatte ungt hett glehrt

Ir Zwüschezyt geit är uf d'Post und dänkt das längt no wit
Im Pub no schnäu äs Kaffee näh – dä Chabis brucht jo Zyt
Uf's Mau hockt Chrigu Wyss und Gerber René no derzue
Chli Wysesse wird jetz trunke, doch mi hett denn no nid grue

So louft de Zyt, s'wird öufi, zwöufi und sogar no meh
Der Suurchabis vergässe - chasch ne äua fasch nümme gseh
Doch hingedri seit är - dä sig hervorragend de gsi
Der Roli Nenniger verschmitzt - und lächelet derbi

Hausfrauenreport

Melodie: Resi i hol di mit dem Traktor ab

D'Gugge isch schträng gsi go Probe
I s'Weekend – merksch's fasch nid - s'wird Obe
Nach äm Ässe nume jasse - das isch nix
Seit zur Sime Adam - d'Nyffenegger Trix

We mer scho mou furt si - ohni Maa
Gö mer doch no nöime go n'äs Cüpli ha
D'Althaus Karin meint - abe loufe duet mer stinke
De s'Heidi von Arx duet dr Maa zue sech winke

Refrain:

Voni - hol üs mit äm Peugeot ab

Voni - bitte, bitte mach nid schlapp

Und da leit dä lieb gueti Ma

Grad äs Glitzer-Shirt und d'Läderchutte a

Bim Pub acho - zueche ha
D'Froue ä Drink - äs Coci dr Maa
Im Verloof vom Obe wird plagiirt
S'isch schön - seit d'Gilome Trix ungeniert

Nach paar Rundine wott me hei
So lang aui Froue si no uf de Bei
Wär ufpasst hett - dä merkt – zu guter Letzt
5 Froue ä Maa - s'Outo isch überbsetzt

Refrain: Voni

De bim heigo – isch's passiert
Wärde sie vor Polizei kontrolliert
Uf Heidi's Schoss d'Sime – zeut die chlini Portion
I de Ouge vor Polizei aus erwachsni Person

Voni muess bloose - schafft's bim 3.Mou
Aber mit Coci hesch 0.0 u bisch nid vou
Wäg eire Person z'viu - s'isch überlade
Choscht's de 60.- Fr - chasch guet teile dä Schade

Refrain: Voni

Eine vom Dorf

Melodie: Basler c fff f aa g f ddd f b b

Genau vor em ne Jahr - vom Bäse isch eine hei gange
Bim Schuelparkplatz, nümme ganz allei - isch är de blibe hange
Paar Jungi Lütt hei züntet– s'git äs Gstürm und ziemlech barsch
Zeigt Müdu grad si Stinkefinger und si schön blutt Arsche

Am 1. Ougschte leit är extra s'Hawaii-Hemli a
Dass är am Abe de zur Fiir is Schützehus cha ga
Doch uf s'Mau muess är sich– go umzieh hei zu sine Chatze
Wiu ihm am späte Nami - s'schöne-Hemli tuet verplatze

Mit paar'ne Ching wott är i s'Kino go – äs isch so flott
Äs gäb ä neue Wicki-Film - me dä go luege wott
Doch ziemlech gli merkt är - mi isch im falsche Film, oh weh
Hätt är doch besser gluegt – jetz louft Prinzässin Lilliffee

Schluss vo eim vom Dorf

Melodie: Üse Ätti

Üse Müdu – mit sim Füdu
Sine Hemli – sine Schüehli
Isch är nid ä tolle Maa?

Är cha chüderle, witzle u mache
S'brucht ä Ma zu serige Sache
Üse Müdu isch ä brave Ma
Wie me keine finde cha

Är cha mäuche, är cha chääre
Die beschte Witze tuet är plääre
Isch är nid ä studierte Ma?

Chönnt i wie - der Müdu läbe
Würid alles - besser verträge
Grad wie der Müdu – wett i's ha
S'würid üs aune – besser ga

Ds SF DRS isch ä Konzärn
D'Moderatore mache eine uf Modärn
D'Radiohörer uf DRS I si die elteri Generation
Doch i fasch jeder Schtung – chunnt d'Information
Wenn dr meh weit wüsse – lueget unger www.blabla.ch
Si heiss nid begriffe, dass vii Lüt gar nid i Computer wei ga

Am Banggheimnis goht's jetzt an Chrage
Mir händ drum nur schnäll welle sage
Wenn du Angst vor em Fiskus hesch, will no söttisch
Schwarzgäld ha
Denn dues gschiider bi uns ins Kässeli abe la

Oder wenn's no nid söttisch begriffe ha:

Ohni Boni goni – Päng

End:

Wenn me – wie mir – us wohre Gschichte Värse dichtet
Vo coole Stories und Begäbeheite brichtet
De cha's passiere, dass es plötzlich afot liire
Drum höre mir jetz uf und göh no chli go fiire

Danke

Schnitzelbankgruppe Schrott